

# — Dr. M mula lawat India 4 hari

Oleh NORDIN MOHAMAD

**KUALA LUMPUR, Khamis.** — Datuk Seri Dr. Mahathir Mohamad berlepas ke India hari ini untuk lawatan rasmi 4 hari, dan antara lain bagi meninjau pendirian Kerajaan baru India mengenai isu-isu antarabangsa, khususnya pengiktirafan negara itu ke atas rejim Heng Samrin di Phnom Penh.

Bercakap kepada para pemberita di lapangan terbang Antarabangsa Kuala Lumpur di Subang, Timbalan Perdana Menteri berkata, beliau mungkin membangkitkan isu tersebut semasa berunding dengan Perdana Menteri, Puan Indira Gandhi mengenai soal-soal hubungan kedua negara, masalah serantau dan antarabangsa.

Datuk Seri Dr. Mahathir menegaskan, "Kerajaan India yang ada sekarang baru dibentuk dan kita perlu meninjau serta mengetahui pendiriannya atas beberapa masalah antarabangsa, khususnya pengiktirafan India terhadap rejim Heng Samrin."

Katanya lagi, pendirian Malaysia dan negara anggota ASEAN yang lain mengenai pengiktirafan rejim Heng Samrin itu adalah jelas.

"Sebarang sokongan dari lain-lain negara terhadap pendirian kita itu adalah dialu-alukan, dan kita akan cuba mendapatkan sokongan dari negara-negara di dunia,"ujarnya.

Datuk Seri Dr. Mahathir berharap, melalui rundingannya dengan Puan Indira Gandhi dan para pemimpin India lainnya dapat merapatkan lagi hubungan antara kedua buah negara.

Lawatan Datuk Seri Dr. Mahathir itu atas jemputan bekas Menteri Perdagangan India.

Bellau yang juga Menteri Perdagangan dan Perindustrian akan menghadiri persidangan Pertubuhan Kemajuan Perindustrian Bangsa-bangsa Bersatu, di New Delhi Isnin ini.

Datuk Seri Dr. Mahathir mensifatkan pertubuhan itu sangat penting bagi Malaysia, kerana negara ini dalam proses menambahkan industri-industri.

Tegasnya, perkembangan industri di Malaysia bergantung kepada kerjasama dengan negara-negara maju.

## Dibantu

"Dalam hal ini, adalah penting kita mendapat kerjasama dari pertubuhan tersebut,"ujarnya lagi.

Menurut beliau, dalam persidangan UNIDO di Lima Peru tahun 1975, persetujuan telah dicapai di mana negara-negara membangun harus dibantu sebanyak 25 peratus pengeluaran industri seluruh dunia.

Semasa di India, Datuk Seri Dr. Mahathir akan melawat industri-industri kecil dan meninjau teknologi yang digunakan.

Menurut beliau, ada kemungkinan teknologi yang digunakan oleh India dalam perusahaan kecilnya lebih sesuai untuk digunakan di Malaysia daripada teknologi-teknologi negara-negara maju.

"Saya juga berharap akan melihat kawasan-kawasan perdagangan dan perindustrian di Daerah Delhi dan Bangaloro,"katanya.

Datuk Seri Dr. Mahathir juga berharap beliau akan dapat belajar cara-cara India meningkatkan perusahaan kecil.

Turut sama dalam rombongan beliau ialah isterinya Datin Seri Dr. Siti Hasmah dan pegawai-pegawai kanan Kerajaan.

Menteri Dalam Negeri, Tan Sri Ghazali Shafie adalah di antara beberapa orang Menteri Kabinet, Timbalan-Timbalan Menteri dan Pegawai Kanan Kerajaan mengucapkan selamat jalan kepada Datuk Seri Dr. Mahathir.

Bahan asal dari Arkib  
Negara Malaysia

No  
No

87